



PRIMEIRU MINISTRU

DISKURSU SUA EXELÊNSIA PRIMEIRU-MINISTRU KAY RALA XANANA GUSMÃO NIAN IHA OKAZIAUN KONFERÊNSIA INTERNASIONAL KONA-BA FUNDU REZERVA SEGURANSA SOSIAL (FRSS)

Sentru Konvencensoens Díli
Díli, Timor-Leste
9 febreiru 2026



Palácio do Governo
Avenida Marginal
Díli, Timor-Leste

Suas Exelências membros Governu
Señór Prezidente Konseihu Administrasaun FRSS

Karísimus konvidadus internasionais

Distintas no distintus konvidadus
Señoras no Señores,

Ho partikulár satisfasaun mak ha'u hola parte iha sesaun abertura Konferénsia Internasionál ida-né, kona-ba "*Fundu Rezerva Seguransa Sosiál – Hodi Garante Sustentabilidade ba Longu Prazu*", tema ida ho relevánsia boot tebetebes ba Timor-Leste.

Ha'u hakarak hato'o ha'u-nia rekoñesimentu ba prezensa ilustre konvidadu sira hotu, liuliu sira ne'ebé mai husi dook partilha sira-nia koñesimentu ho sira-nia experiénsia barak tebetebes kona-ba matéria ida-ne'e, iha momentu ida ne'ebé espesialmente desizivu ba futuru Sistema Seguransa Sosiál Timor-Leste nian.

Fundu Rezerva Seguransa Sosiál iha importánsia estratéjika ba ita-nia país, tanba hanesan garantia pagamentu futuru ba pensoens ho prestasoens sociais seluk tan, liuliu iha kontekstu vulnerabilidade boot ne'ebé karakteriza ita-nia povu.

Tinan kotuk, iha novembru, ita asinala 50.º aniversáriu proklamasan independéncia Timor-Leste. Infelizmente, halo ita mós hanoin hikas tinan 50 hahú terrível okupasaun, nebé akontece foin mak halo loron sia, hodi hanehan ita-nia povu durante tinan 24, ne'ebé naruk no difísil tebetebes.

Tanba ne'e mak ha'u sempre defende konstrusaun sistema seguransa sosiál ida ne'ebé robustu, bele proteje ita-nia ferik ho katuas sira, ita-nia feto-faluk ho mane-faluk sira, ita-nia oan-kiak sira, ema sira ho defisiénsia, no mós ema ho familia sira ne'ebé moris iha situaun vulnerabilidade boot liu. Ita-nia istória kona-na okupasaun, rezisténsia ho

restaurasaun independénsia, liuliu, hanesan istória ida nakonu ho sofrimentu no fragilidade umana. Pilar saída tan mak esensiál liu ba ita-nia Estadu duké kompromisu firme kona-ba promosaun dignidade ema ida-idak nian ho ita-nia povu tomak nian?

Ita bele husu ba ita an rasik, medidas fundamentais liu mak saída loos ne'ebé Estadu bele adota, iha kedan inísiu rekonstrusaun nasional, kompara ho apoiu ba ema sira ne'ebé luta ba ita-nia libertasaun, familias husi ita-nia mártir sira, no ema sira ne'ebé tenke hahú hadi'a hikas sira-nia moris husi zero.

Apoiu ne'e mak hanesan instrumentu desizivu rekonsiliaun no rekonstrusaun nasional, ne'ebé permite ita hakat ba oin to'o ohin-loron, hodi redúz, maski neineik, injustisas, ekskluzau, dezigualdade ho pobreza nebé marka ita-nia sociedade.

Perkursu (ka,dalan naruk) ne'e mak permite ita to'o iha momentu atuál, ne'ebé ita la'ós de'it iha Fundu Rezerva Seguransa Sosiál ida, ne'ebé kria iha 2020 no operasionál dezde 2023, maibé ita bele haree katak Fundu ne'e integra ona iha atividades investimentu iha merkadus finanseiros internacionais – hanesan marko estruturál ida iha dezvoltamentu ita-nia sistema seguransa sosiál no, liután ida ne'e, iha dezvoltamentu ekonómiku no institusionál Timor-Leste nian.

Ne'é mak afirmasaun husi país ida ne'ebé hatene hanoin, sente no poupa ho forma kolektiva. Ho Fundu ida ne'ebé reforsa sustentabilidade finanseira sistema nian, ne'ebé jera rendimentus adisionais liuhusi investimentus prudentes no bele kontribui ba estabilidade ekonómika ho sosiál, hodi proteje ita-nia povu, liuliu sira ne'ebé iha pozisaun frájl liu.

Nune'e mós, Fundu ne'e promove repartisaun enkargus ho benefísius ne'ebé justa no ekilibrada liu entre jerasaun sira, hodi nune'e evita jerasoens futuras simu todan tanba níveis exesivus husi kontribuisoens ou impostus. Iha Timor-Leste, ne'ebé parte significativa husi reseitas públicas mai husi rekursos naturais ezgotáveis, Fundu Rezerva

ne'e dezempeña mós papél krusiál ida iha transformasaun rikeza temporária ne'e iha ativos finanseirus ba tempu naruk, hodi nune'e mitiga (ka hamenus) volatilidade ekonómika no reforsa reziliénsia Estadu.

Buat hirak-né hotu ezije, naturalmente, modelu irrepreensível (ka impekável) ida husi boa governasaun, transparénsia no rigór iha jestaumn Fundu Rezerva. Só nune'e mak ita bele konsolida kredibilidade husi ita-nia instituisoens no hametin konfiansa povu timor tomak iha Sistema Seguransa Sosiál, ne'ebé onra sakrifísiu husi jerasaun sira ne'ebé uluk liu ita no garante maior seguransa ho dignidade ba jerasaun sira ne'ebé sei tuir mai.

Exelénsias

Señoras no Señores,

Ohin-ne'e, ha'u-nia apelu, nu'udar Primeiru-Ministru, mak diskusaun sira iha loron rua ne'e laran tenke kontribui ba modelu nasional ida ne'ebé benefisia futuru Timor-Leste, ne'ebé la iha sidadaun ida mak tau ba kotuk. Ita-nia Fundu Rezerva Seguransa Sosiál ne'e la'ós de'it hanesan mekanizmu finanseiru ida – maibé prova konkreta husi ita-nia solidariedade, ita-nia reziliénsia ho ita-nia vizaun ba nasaun ida ne'ebé forte no justa.

Favór ida, hanoin didi'ak ba kona-ba buat hirak ne'ebé ita konkista ona. Ita sai husi 24 anus okupasaun impiedeza (ka, brutal) ida atu harii, neineik, sistema kontributivu ida ne'ebé bele proteje inan, aman, ferik-katuas ho família vulnerável sira.

Trabalhadór sira ohin-loron kontribui ba "karteira komún" ida ne'ebé selu pensoens ho subsídios agora nian – maibé Fundu Rezerva ne'e sei garante katak aban-bainrua, bainhira númerus muda no idozus sira-nia númeru aumenta, ita sei iha rekursus ba ema hotu-hotu. Ita-nia resposta ba populasaun ne'ebé idade aumenta no ba dezafius husi merkadu trabalhu mak: kria empregus dignus, lori tan sidadaun sira kontribui no transforma exedentes (ka, surplus) iha investmentus intelijentes.

Ita tenke servisu maka'as atu ita-nia Fundu ne'e tenke autónomu no protejidu didi'ak kontra tentasoens polítikas. Ne'e signifika mós katak jestaun ida nebé ho independénsia téknika, independente husi orsamentu Estadu, no bele investe iha merkadus internacionais. Ita hakarak iha depóztus seguros, asoens rentáveis, obrigasoens estáveis ho retornus favoráveis.

Iha período ezisténsia ida ne'ebé ita bele dehan badak, montante Fundu representa 14,6% husi ita-nia PIB naun petrolíferu, reserva murak ida ne'ebé konverte ita-nia petróleu iha seguransa duradoura ba jerasoens futuras.

Maibé buat hirak-ne'e hotu sei la funsiona se la iha konfiansa. Tanba ne'e, ita halo diálogu ho atór relevante sira hotu, ita publika relatórius transparentes no explika kada pasu povu timor tomak.

Ha'u espera katak husi konferénsia internasionál ida-ne'e mosu konkluzoens ne'ebé bele apoia ultrapasa dezafiu sira ne'ebé Timor-Leste hasoru no garante sustentabilidade Fundu Reserva Seguransa Sosiál, no mós liuhusi uniaun esforsus entre Governu, trabalhadores, empresas ho ita-nia parseiru sira.

Hamutuk, ita sei bele garante pensoens dignas, hamenus moris-kiak no harii Timor-Leste ida ne'ebé prósperu liu.

Tanba país ida ne'ebé proteje nia povu no, liuliu, família sira ne'ebé vulneráveis liu husi povu, mak país ne'ebé ita hotu-hotu mehi no luta atu hetan.

Obrigadu barak.

Kay Rala Xanana Gusmão